

南海則皆不復舊而今之議者以為已久之事不必舉論原州之變出於辛丑南海之變出於庚子其間纔隔一年而復原州之變而不復南海至為不當上曰降與不降事同而法異果不可也計其年之久近未便當與大臣議定○憲府啓曰近來人心薄惡巧詐橫生謀背本主者欲投託於內需司必先交結外知部重賂本司官員下人輩或稱陳告或稱逃亡百端經營得濟奸術以累清明之治頗多有之非但此也貴戚之家謀欲奪人田民者亦以內需司為階梯或成公事欺罔啓下移文各道各官公然成籍差人押來勢孤力薄者束手見奪劫於威勢抱冤未伸人皆痛憤王子駙馬出閣之後則各自為家乃其一家之事何與於公家如賜牌田民推刷時則已矣其餘買賣記上傳係折受等田民則所當各自推之自今以後凡王子駙馬家私物勿令內需司啓下推尋事請奉承傳答曰王子駙馬出閣之後無異於外人凡事以內需司為之不當然此非各司例為遵行之事不至於奉承傳矣○夜西方有氣如火○乙未政府